

# “IL CARRISTA,,

- *Patanù, drinta sò cassion d'assel:  
un ai comand, setà, serio; decis,  
l'autr drit, atent a la mitragliatris  
a l'ha në sguard molà come 'n cotel.*
- *Da na cita filura a s-ciario 'l cel  
ma da 'n pertus rotond guardo 'l nemis,  
l'han tuti doi un sentiment precis:  
doi cheur ch'a bato con l'istess martel.*
- *E 'l cheur a va per fòss, piarde, valon  
mostro 'd fer angrignà su quatr arssòrt (1)  
ch'a ronfa e a braja come 'n forgiatron.*
- *La guèra a scauda j' òmini e ij motor;  
gnun peul fermeje al mond, salvò la Mòrt,  
la Mòrt che a pòrto e a sëmno 'ntorn a lor.*
- *Mila e peuj mila e peuj mila ani fà  
s'istess desert e pèr l'istessa pista  
s'un chèr ëd brons doi Egissian carrista  
a fasijo al galòp l'istessa strà.*
- *Un a guidava ij doi cavai sfrandà (2)  
l'autr corassà d'aram pèr la conquista  
a manegiava con un deuit d'artista  
lè scù 'd coram e la soa longa spà.*
- *E 'l chèr antich parei dël chèr d'adess  
a s'anfilava ant ël pì cru dla guèra  
suarssand con le faussije bestie e soldà.*
- *E 'l sol d'anlora come 'l sol d'adess  
a beivija ij reu 'd sangh slargà sla tèra...  
Tranta secoi!... e l'òm l'è non cambià.*

(Dalle poesie piemontesi di Nino Costa)

(1) molle (2) sfrenati